

# 大寶積經 · 普明菩薩會



## 南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

## 大寶積經．普明菩薩會

如是我聞：一時，佛在王舍城耆闍崛山中。

與大比丘眾八千人俱；

菩薩摩訶薩萬六千人，皆是阿惟越致，從諸佛土而來集會，悉皆一生當成無上正真大道。

爾時，世尊告大迦葉：菩薩有四法退失智慧。

何謂為四？①不尊重法、不敬法師。②所受深法，祕不說盡。③有樂法者，為作留難。說諸因緣，沮壞其心。④憍慢自高，卑下他人。

迦葉！是為菩薩四法退失智慧。

復次，迦葉！菩薩有四法得大智慧。

何謂為四？①常尊重法、恭敬法師。②隨所聞法，以清淨心，廣為人說，不求一切名聞利養。③知從多聞生於智慧，勤求不懈，如救頭燃，聞經誦持。④樂如說行，不隨言說。

迦葉！是為菩薩四法得大智慧。

復次，迦葉！菩薩有四法失菩提心。

何謂為四？①欺誑師長，已受經法而不恭敬。②無疑悔處，令他疑悔。③求

大乘者，訶罵誹謗，廣其惡名。④以諂曲心，與人從事。

迦葉！是為菩薩四法失菩提心。

復次，迦葉！菩薩有四法世世不失菩提之心，乃至道場，自然現前。

何謂為四？①失命因緣，不以妄語，何況戲笑。②常以直心與人從事，離諸諂曲。③於諸菩薩，生世尊想，能於四方稱揚其名。④自不愛樂諸小乘法，所化眾生，皆悉令住無上菩提。

迦葉！是為菩薩四法世世不失菩提之心，乃至道場，自然現前。

復次，迦葉！菩薩有四法所生善法，滅不增長。

何謂為四？①以憍慢心讀誦修學路伽耶經。②貪利養心詣諸檀越。③憎毀菩薩。④所未聞經，違逆不信。

迦葉！是為菩薩四法所生善法，滅不增長。

復次，迦葉！菩薩有四法所生善法，增長不失。

何謂為四？①捨離邪法，求正經典，六波羅蜜菩薩法藏。心無憍慢，於諸眾生，謙卑下下。②如法得施，知量知足，離諸邪命，安住聖種。③不出他人罪過虛實，不求人短。④若於諸法，心不通達，作如是念：佛法無量，隨眾所樂而為演說，唯佛所知，非我所解，以佛為證，不生違逆。

迦葉！是為菩薩四法所生善法，增長不失。

復次，迦葉！菩薩有四曲心，所應遠離。

何謂為四？①於佛法中，心生疑悔。②於諸眾生，憍慢瞋恨。③於他利養，起嫉妬心。④訶罵菩薩，廣其惡名。

迦葉！是為菩薩四曲心，所應遠離。

復次，迦葉！菩薩有四直心之相。

何謂為四？①所犯眾罪，終不覆藏，向他發露，心無蓋纏。②若失國界身命財利，如是急事，終不妄語，亦不餘言。③一切惡事，罵詈毀謗，搥打繫縛，種種傷害，受是苦時，但自咎責，自憶業報，不瞋恨他。④安住信力，若聞甚深難信佛法，自心清淨，能悉受持。

迦葉！是為菩薩有四直心之相。

復次，迦葉！菩薩有四敗壞之相。

何謂為四？①讀誦經典，而生戲論。②不隨法行，不能奉順恭敬師長令心歡悅。③損他供養，自違本誓，而受信施。④見善菩薩，輕慢不敬。

迦葉！是為菩薩有四敗壞之相。

復次，迦葉！菩薩有四善順之相。

何謂為四？①所未聞經，聞便信受，如所說行，依止於法，不依言說。②隨順師教，能知意旨，以喻言語，所作皆善，不失師意。③不退戒定，以調順心而受供養。④見善菩薩，恭敬愛樂，隨順善人，稟受德行。

迦葉！是為菩薩有四善順之相。

復次，迦葉！菩薩有四錯謬。

何謂為四？①不可信人，與之同意，是菩薩謬。②非器眾生，說甚深法，是菩薩謬。③樂大乘者，為讚小乘，是菩薩謬。④若行施時，但與持戒，供養善者，不與惡人，是菩薩謬。

迦葉！是為菩薩四謬。

復次，迦葉！菩薩有四正道。

何謂為四？①於諸眾生，其心平等。②普化眾生，等以佛慧。③於諸眾生，平等說法。④普令眾生，等住正行。

迦葉！是為菩薩有四正道。

復次，迦葉！菩薩有四非善知識，非善等侶。

何謂為四？①求聲聞者，但欲自利。②求緣覺者，喜樂少事。③讀外經典路伽耶毗文辭嚴飾。④所觀近者，但增世利，不益法利。

迦葉！是為菩薩有四非善知識，非善等侶。

復次，迦葉！菩薩有四善知識、四善等侶。

何謂為四？①諸來求者，是善知識，佛道因緣故。②能說法者，是善知識，生智慧故。③能教他人令出家者，是善知識，增長善法故。④諸佛世尊，是善知識，增長一切諸佛法故。

迦葉！是為菩薩四善知識、四善等侶。

復次，迦葉！菩薩有四非菩薩而似菩薩。

何謂為四？①貪求利養，而不求法。②貪求名稱，不求福德。③貪求自樂，不救眾生以滅苦法。④樂聚徒眾，不樂遠離。

迦葉！是為四非菩薩而似菩薩。

復次，迦葉！菩薩有四真實菩薩。

何謂為四？①能信解空，亦信業報。②知一切法無有吾我，而於眾生起大悲

心。③深樂涅槃，而遊生死。④所作行施，皆為眾生，不求果報。

迦葉！是為四種真實菩薩福德。

復次，迦葉！菩薩有四大藏。

何謂為四？若有菩薩，①值遇諸佛。②能聞六波羅蜜及其義解。③以無礙心視說法者。④樂遠離行，心無懈怠。

迦葉！是為菩薩有四大藏。

復次，迦葉！菩薩有四法能過魔事。

何謂為四？①常不捨離菩提之心。②於諸眾生，心無恚礙。③覺諸知見。④心不輕賤一切眾生。

迦葉！是為菩薩四法能過魔事。

復次，迦葉！菩薩有四法攝諸善根。

何謂為四？①在空閑處，離諂曲心。②諸眾生中，行四攝法，而不求報。③為求法故，不惜身命。④修諸善根，心無厭足。

迦葉！是為菩薩四法攝諸善根。

復次，迦葉！菩薩有四無量福德莊嚴。

何謂為四？①以清淨心而行法施。②於破戒人，生大悲心。③於諸眾生中，稱揚讚歎菩提之心。④於諸下劣，修習忍辱。

迦葉！是為菩薩有四無量福德莊嚴。

復次，迦葉！名菩薩者，不但名字為菩薩也。能行善法，行平等行，名為菩薩。略說成就三十二法，名為菩薩。

何謂三十二法？①常為眾生，深求安樂，皆令得住一切智中。②心不憎惡他人智慧。③破壞憍慢。④深樂佛道。⑤愛敬無虛，親厚究竟，於怨親中其心同等，至於涅槃。⑥言常含笑，先意問訊。⑦所為事業，終不中息。⑧普為眾生，等行大悲。⑨心無疲倦。⑩多聞無厭。⑪自求己過，不說他短。⑫以菩提心，行諸威儀。⑬所行惠施，不求其報。⑭不依生處，而行持戒。⑮諸眾生中，行無礙忍。⑯為修一切諸善根故，勤行精進。⑰離生無色，而起禪定。⑱行方便慧。⑲應四攝法。⑳善惡眾生，慈心無異。㉑一心聽法。㉒心住遠離。㉓心不樂著世間眾事。㉔不貪小乘，於大乘中常見大利。㉕離惡知識。㉖親近善友。㉗成四梵行，遊戲五通。㉘常依真智。㉙於諸眾生，邪行正行，俱不捨棄。㉚言常決定。㉛貴真實法。㉜一切所作，菩提為首。

如是，迦葉！若人有此三十二法，名為菩薩。

復次，迦葉！菩薩福德，無量無邊，當以譬喻因緣故知。

※迦葉！譬如一切大地，眾生所用，無分別心，不求其報。

菩薩亦爾，從初發心，至坐道場，一切眾生，皆蒙益利，心無分別，不求其報。

※迦葉！譬如一切水種，百穀藥木皆得增長。

菩薩亦爾，自心淨故，慈悲普覆一切眾生，皆令增長一切善法。

※迦葉！譬如一切火種，皆能成熟百穀果實。

菩薩智慧亦復如是，皆能成熟一切善法。

※迦葉！譬如一切風種，皆能成立一切世界。

菩薩方便亦復如是，皆能成立一切佛法。

※迦葉！譬如月初生時，光明形色，日日增長。

菩薩淨心亦復如是，一切善法，日日增長。

※迦葉！譬如日之初出，一時放光，普為一切眾生照明。

菩薩亦爾，放智慧光，一時普照一切眾生。

※迦葉！譬如師子獸王，隨所至處，不驚不畏。

菩薩亦爾，清淨持戒，真實智慧，隨所住處，不驚不畏。

※迦葉！譬如善調象王，能辦大事，身不疲極。

菩薩亦爾，善調心故，能為眾生作大利益，心無疲倦。

※迦葉！譬如有諸蓮花，生於水中，水不能著。

菩薩亦爾，生於世間，而世間法所不能汙。

※迦葉！譬如有人伐樹，根在還生。

菩薩亦爾，方便力故，雖斷結使，有善根愛，還生三界。

※迦葉！譬如諸方流水，入大海已，皆為一味。

菩薩亦爾，以種種門，集諸善根，迴向阿耨多羅三藐三菩提，皆為一味。

※迦葉！譬如須彌山王，忉利諸天及四天王皆依止住。

菩薩菩提心亦復如是，為薩婆若所依止住。

※迦葉！譬如有大國王，以臣力故，能辦國事。

菩薩智慧亦復如是，方便力故皆能成辦一切佛事。

※迦葉！譬如天晴明時，淨無雲翳，必無雨相。

寡聞菩薩無法雨相亦復如是。

※迦葉！譬如天陰雲時，必能降雨，充足眾生。

菩薩亦爾，從大悲雲，起大法雨，利益眾生。

※迦葉！譬如隨轉輪王所出之處，則有七寶。

如是，迦葉！菩薩出時，三十七品現於世間。

※迦葉！譬如隨摩尼珠所在之處，則有無量金銀珍寶。

菩薩亦爾，隨所出處，則有無量百千聲聞辟支佛寶。

※迦葉！譬如忉利諸天，入同等園，所用之物，皆悉同等。

菩薩亦爾，真淨心故，於眾生中平等教化。

※迦葉！譬如呪術藥力，毒不害人。

菩薩結毒亦復如是，智慧力故不墮惡道。

※迦葉！譬如諸大城中所棄糞穢，若置甘蔗蒲桃田中，則有利益。

菩薩結使亦復如是，所有遺餘，皆是利益薩婆若因緣故。

如是，迦葉！菩薩欲學是寶積經者，常應修習正觀諸法。

云何為正觀？所謂真實思惟諸法。

真實正觀者，不觀我、人、眾生、壽命。是名中道真實正觀。

復次，迦葉！真實觀者，觀色非常亦非無常，觀受想行識非常亦非無常。是名中道真實正觀。

復次，迦葉！真實觀者，觀地種非常亦非無常，觀水火風種非常亦非無常。是名中道真實正觀。

所以者何？以常是一邊，無常是一邊。常、無常，是中無色、無形、無明、無知。是名中道諸法實觀。

我是一邊，無我是一邊。我、無我，是中無色、無形、無明、無知。是名中道諸法實觀。

復次，迦葉！若心有實，是為一邊。若心非實，是為一邊。若無心識亦無心數法，是名中道諸法實觀。

如是，善法、不善法，世法、出世法，有罪法、無罪法，有漏法、無漏法，有為法、無為法，乃至有垢法、無垢法，亦復如是，離於二邊，而不可受，亦不可說。是名中道諸法實觀。

復次，迦葉！有是一邊，無是一邊。有無中，無色、無形、無明、無知。是

名中道諸法實觀。

復次，迦葉！我所說法十二因緣，無明緣行，行緣識，識緣名色，名色緣六入，六入緣觸，觸緣受，受緣愛，愛緣取，取緣有，有緣生，生緣老死憂悲苦惱，如是因緣，但為集成是大苦聚。若無明滅則行滅，行滅故識滅，識滅故名色滅，名色滅故六入滅，六入滅故觸滅，觸滅故受滅，受滅故愛滅，愛滅故取滅，取滅故有滅，有滅故生滅，生滅故如是老死憂悲眾惱大苦皆滅。

明與無明，無二無別，如是知者，是名中道諸法實觀。

如是，行及非行，識及非識。名色可見及不可見，諸六入處，及六神通，觸及非觸，受與受滅，愛與愛滅，取與取滅，有與有滅，生與生滅，老死與老死滅，是皆無二無別。如是知者，是名中道諸法實觀。

復次，迦葉！真實觀者：不以空故，令諸法空，但法性自空。不以無相故，令法無相，但法自無相。不以無願故，令法無願，但法自無願。不以無起、無生、無我、無取、無性故，令法無起、無取、無性，但法自無起、無取、無性。如是觀者，是名實觀。

復次，迦葉！非無人故，名曰為空，但空自空，前際空，後際空，中際亦空。當依於空，莫依於人。若以得空，便依於空，是於佛法，則為退墮。

如是，迦葉！寧起我見積若須彌，非以空見起增上慢。

所以者何？一切諸見，以空得脫。若起空見，則不可除。

迦葉！譬如醫師授藥，令病擾動。是藥在內而不出者，於意云何，如是病人寧得瘥不？

不也，世尊。是藥不出，其病轉增。

如是，迦葉！一切諸見，唯空能滅。若起空見，則不可除。

譬如有人，怖畏虛空，悲嗥椎膺，作如是言：「我捨虛空」。於意云何，是虛空者，可捨離不？

不也，世尊！

如是，迦葉！若畏空法，我說「是人狂亂失心」。

所以者何？常行空中，而畏於空。

※譬如畫師，自手畫作夜叉鬼像。見已怖畏，迷悶躡地。

一切凡夫亦復如是，自造色聲香味觸故，往來生死，受諸苦惱，而不自覺。

※譬如幻師，作幻人已，還自殘食。

行道比丘亦復如是，有所觀法，皆空皆寂，無有堅固，是觀亦空。

※迦葉！譬如兩木相磨，便有火生，還燒是木。

如是，迦葉！真實觀故，生聖智慧。聖智生已，還燒實觀。

※譬如燃燈，一切黑闇，皆自無有，無所從來，去無所至。非東方來，去亦不至。南西北方四維上下，不從彼來，去亦不至。而此燈明，無有是念：「我能滅闇」。但因燈明，法自無闇。明闇俱空，無作無取。

如是，迦葉！實智慧生，無智便滅。智與無智，二相俱空，無作無取。

※迦葉！譬如千歲冥室，未曾見明。若燃燈時，於意云何，闇寧有念「我久住此不欲去」耶？

不也，世尊！若燃燈時，是闇無力而不欲去，必當磨滅。

如是，迦葉！百千萬劫久習結業，以一實觀，即皆消滅。其燈明者，聖智慧是。其黑闇者，諸結業是。

※迦葉！譬如種在空中而能生長，從本已來，無有是處。

菩薩取證亦復如是，增長佛法，終無是處。

※迦葉！譬如種在良田，則能生長。

如是，迦葉！菩薩亦爾，有諸結使離世間法，能長佛法。

※迦葉！譬如高原陸地，不生蓮花。

菩薩亦復如是，於無為中，不生佛法。

※迦葉！譬如卑溼淤泥中，乃生蓮花。

菩薩亦爾，生死淤泥邪定眾生，能生佛法。

※迦葉！譬如有四大海，滿中生酥。

菩薩有為善根甚多無量，亦復如是。

※迦葉！譬如若破一毛以為百分，以一分毛取海一滴。

一切聲聞有為善根亦復如是。

※迦葉！譬如小芥子孔，所有虛空。

一切聲聞有為智慧，亦復如是。

※迦葉！譬如十方虛空無量無邊。

菩薩有為智慧甚多，為力無量，亦復如是。

※迦葉！譬如刹利大王，有大夫人，與貧賤通，懷妊生子。於意云何，是王子不？

不也，世尊！

如是，迦葉！我聲聞眾亦復如是。雖為同證以法性生，不名如來真實佛子。

※迦葉！譬如刹利大王與使人通，懷妊生子。雖出下姓，得名王子。

初發心菩薩亦復如是，雖未具足福德智慧，往來生死，隨其力勢，利益眾生，是名如來真實佛子。

※迦葉！譬如轉輪聖王而有千子，未有一人有聖王相。聖王於中，不生子想。

如來亦爾，雖有百千萬億聲聞眷屬圍繞，而無菩薩，如來於中不生子想。

※迦葉！譬如轉輪聖王有大夫人懷妊七日，是子具有轉輪王相。諸天尊重，過餘諸子具身力者。所以者何？是胎王子，必紹尊位，繼聖王種。

如是，迦葉！初發心菩薩亦復如是。雖未具足諸菩薩根，如胎王子，諸天神

王，深心尊重，過於八解脫大阿羅漢。所以者何？如是菩薩，名紹尊位，不斷佛種。

※迦葉！譬如一瑠璃珠，勝於水晶如須彌山。

菩薩亦爾，從初發心，便勝聲聞辟支佛眾。

※迦葉！譬如大王夫人生子之日，小王羣臣，皆來拜謁。

菩薩亦爾，初發心時，諸天世人皆當禮敬。

※迦葉！譬如雪山王中，生諸藥草，無有所屬，無所分別。隨病所服，皆能療治。

菩薩亦爾，所集智藥，無所分別，普為眾生平等救護。

※迦葉！譬如月初生時，眾人愛敬，踰於滿月。

如是，迦葉！信我語者，愛敬菩薩過於如來。所以者何？由諸菩薩，生如來故。

※迦葉！譬如愚人，捨月禮事星宿。

智者不爾，終不捨離菩薩行者，禮敬聲聞。

※迦葉！譬如諸天及人一切世間，善治偽珠，不能令成瑠璃寶珠。

求聲聞人亦復如是，一切持戒成就禪定，終不能得坐於道場成無上道。

※迦葉！譬如治瑠璃珠，能出百千無量珍寶。

如是，教化成就菩薩，能出百千無量聲聞辟支佛寶。

爾時，世尊復告大迦葉：菩薩常應求利眾生。又正修習一切所有福德善根，等心施與一切眾生。所得智藥，遍到十方，療治眾生，皆令畢竟。

云何名為畢竟智藥？謂：

不淨觀治於貪婬，以慈心觀治於瞋恚，以因緣觀治於愚癡。

以行空觀治諸妄見，以無相觀治諸憶想分別緣念，以無願觀治於一切出三界願，以四非倒治一切倒。

以諸有為皆悉無常，治無常中計常顛倒。以有為苦，治諸苦中計樂顛倒。以無我，治無我中計我顛倒。以涅槃寂，治不淨中計淨顛倒。

以四念處，治諸依倚身受心法。行者觀身，順身相觀，不墮我見；順受相觀，不墮我見；順心相觀，不墮我見；順法相觀，不墮我見。是四念處，能厭一切身受心法，開涅槃門。

以四正勤，能斷已生諸不善法及不起未生諸不善法。未生善法，悉能令生。

已生善法，能令增長。取要言之，能斷一切諸不善法，成就一切諸善之法。

以四如意足，治身心重壞身一切，令得如意自在神通。

以五根，治無信、懈怠、失念、亂心、無慧眾生。

以五力，障諸煩惱力。

以七覺分，治諸法中，疑悔錯謬。

以八正道，治墮邪道一切眾生。

迦葉！是為菩薩畢竟智藥，菩薩常應勤修習行。

又，大迦葉！閻浮提內諸醫師中，耆域醫王，最為第一。假令三千大千世界所有眾生皆如耆域，若有人問「心中結使煩惱，邪見疑悔病藥。」尚不能答，何況能治！菩薩於中應作是念：「我終不以世藥為足，我當求習出世智藥，亦

修一切善根福德。」如是，菩薩得智藥已，遍到十方畢竟療治一切眾生。

何謂菩薩出世智藥？謂：知諸法從緣合生，信一切法，無我，無人，亦無眾生，壽命，知見無作無受。信解通達無我我所。於是，空法無所得中，不驚不畏。勤加精進，而求心相。

菩薩如是求心，何等是心？若貪欲耶？若瞋恚耶？若愚癡耶？若過去未來現在耶？

若心過去，即是盡滅。若心未來，未生未至。若心現在，則無有住。是心非內非外亦非中間。是心無色無形無對，無識無知無住無處。

如是心者，十方三世一切諸佛不已見，不今見，不當見。若一切佛過去來今而所不見，云何當有？但以顛倒想故，心生諸法，種種差別。是心如幻，以憶

想分別故，起種種業，受種種身。

又，大迦葉！

心去如風，不可捉故。

心如流水，生滅不住故。

心如燈燄，眾緣有故。

是心如電，念念滅故。

心如虛空，客塵汙故。

心如獼猴，貪六欲故。

心如畫師，能起種種業因緣故。

心不一定，隨逐種種諸煩惱故。

心如大王，一切諸法增上主故。

心常獨行，無二無伴，無有二心能一時故。

心如怨家，能與一切諸苦惱故。

心如狂象，蹈諸土舍，能壞一切諸善根故。

心如吞鈎，苦中生樂想故。

是心如夢，於無我中生我想故。

心如蒼蠅，於不淨中起淨想故。

心如惡賊，能與種種考掠苦故。

心如惡鬼，求人便故。

心常高下，貪恚所壞故。

心如盜賊，劫一切善根故。

心常貪色，如蛾投火。心常貪聲，如軍久行樂勝鼓音。心常貪香，如豬喜樂不淨中臥。心常貪味，如小女人樂著美食。心常貪觸，如蠅著油。

如是，迦葉！求是心相，而不可得。

若不可得，則非過去未來現在。

若非過去未來現在，則出三世。

若出三世，非有非無。

若非有非無，即是不起。

若不起者，即是無性。

若無性者，即是無生。

若無生者，即是無滅。

若無滅者，則無所離。

若無所離者，則無來無去無退無生。

若無來無去無退無生，則無行業。

若無行業，則是無為。

若無為者，則是一切諸聖根本。是中無有持戒，亦無破戒。

若無持戒無破戒者，是則無行，亦無非行。

若無有行無非行者，是則無心，無心數法。

若無有心心數法者，則無有業，亦無業報。

若無有業無業報者，則無苦樂。

若無苦樂，即是聖性。是中無業無起業者，無有身業亦無口業亦無意業。是中無有上中下差別。聖性平等，如虛空故。

是性無別，一切諸法等一味故。

是性遠離，離身心相故。

是性離一切法，隨順涅槃故。

是性清淨，遠離一切煩惱垢故。

是性無我，離我我所故。

是性無高下，從平等生故。

是性真諦，第一義諦故。

是性無盡，畢竟不生故。

是性常住，諸法常如故。

是性安樂，涅槃為第一故。

是性清淨，離一切相故。

是性無我，求我不可得故。

是性真淨，從本已來畢竟淨故。

又，大迦葉！汝等當自觀內，莫外馳騁。

※如是，大迦葉！當來比丘，如犬逐塊。

云何比丘如犬逐塊？譬如有人，以塊擲犬，犬即捨人，而往逐之。

如是，迦葉！有沙門婆羅門怖畏好色聲香味觸故，住空閑處，獨無等侶，離眾慣鬧，身離五欲，而心不捨。

是人，有時，或念好色聲香味觸，貪心樂著，而不觀內，不知云何當得離色聲香味觸。以不知故，有時，來入城邑聚落，在人眾中，還為好色聲香味觸五欲所縛。

以空閑處，持俗戒故，死得生天，又為天上五欲所縛。從天上沒，亦不得脫於四惡道，地獄、餓鬼、畜生、阿修羅道。

是名比丘如犬逐塊。

※又，大迦葉！云何比丘不如犬逐塊？

若有比丘，為人所罵，而不報罵。打害、瞋毀，亦不報毀。但自內觀，求伏其心，作如是念：「罵者為誰？受者為誰？打者，害者，毀者，瞋者，亦復為誰？」

是名比丘不如犬逐塊。

※迦葉！譬如善調馬師，隨馬慳悞，即時能伏。

行者亦爾，隨心所向，即時能攝，不令放逸。

※迦葉！譬如咽塞病，即能斷命。

如是，迦葉！一切見中，唯有我見，即時能斷於智慧命。

※譬如有人，隨所縛處，而求解脫。

如是，迦葉！隨心所著，應當求解。

※又，大迦葉！出家之人有二不淨心。

何謂為二？①讀誦路伽耶等外道經書，②多畜諸好衣鉢。

※又，出家人有二堅縛。

何謂為二？①見縛，②利養縛。

※又，出家人有二障法。

何謂為二？①親近白衣，②憎惡善人。

※又，出家人有二種垢。

何謂為二？①忍受煩惱，②貪諸檀越。

※又，出家人有二雨雹壞諸善根。

何謂為二？①敗逆正法，②破戒，受人信施。

※又，出家人有二癰瘡。

何謂為二？①求見他過，②自覆其罪。

※又，出家人有二燒法？

何謂為二？①垢心，受著法衣，②受他持戒善人供養。

※又，出家人有二種病。

何謂為二？①懷憎上慢而不伏心，②壞他發大乘心。

又，大迦葉！謂沙門者，有四種沙門。

何謂為四：①形服沙門，②威儀欺誑沙門，③貪求名聞沙門，④實行沙門。

※何謂形服沙門？

有一沙門，形服具足，被僧伽梨，剃除鬚髮，執持應器，而便成就不淨身業、不淨口業、不淨意業，不善護身，慳嫉懈怠，破戒為惡。

是名形服沙門。

※何謂威儀欺誑沙門？

有一沙門，具足沙門身四威儀行立坐臥，一心安詳，斷諸美味，修四聖種，遠離眾會出家憤鬧之眾，言語柔輒。行如是法，皆為欺誑，不為善淨。而於空法，有所見得。於無得法，生恐畏心，如臨深想。於空論比丘，生怨賊想。

是名威儀欺誑沙門。

※何謂名聞沙門？

有一沙門，以現因緣，而行持戒，欲令人知。自力讀誦，欲令他人知為「多聞」。自力獨處在於閒靜，欲令人知為「阿練若」。少欲知足，行遠離行，但為人知。不以厭離，不為善寂，不為得道，不為沙門婆羅門果，不為涅槃。

是為名聞沙門。

※復次，迦葉！何謂實行沙門？

有一沙門，不貪身命，何況利養！聞諸法，空無相無願，心達隨順，如所說行。不為涅槃而修梵行，何況三界！尚不樂起空無我見，何況我見眾生人見！離依止法，而求解脫一切煩惱。見一切諸法本來無垢畢竟清淨，而自依止，亦不依他。以正法身，尚不見佛，何況形色。以空遠離，尚不見法，何況貪著音聲言說！以無為法，尚不見僧，何況當見有和合眾！而於諸法，無所斷除，無所修行，不生生死，不著涅槃，知一切法本來寂滅，不見有縛，不求解脫。

是名實行沙門。

如是，迦葉！汝等當習實行沙門法，莫為名字所壞。

※迦葉！譬如貧窮賤人，假富貴名。於意云何，稱此名不？

不也，世尊！

如是，迦葉！但名沙門婆羅門，而無沙門婆羅門實功德行。亦如貧人，為名所壞。

※譬如有人漂沒大水，渴乏而死。

如是，迦葉！有諸沙門，多讀誦經，而不能止貪恚癡渴，法水漂沒，煩惱渴死，墮諸惡道。

※譬如藥師，持藥囊行，而自身病，不能療治。

多聞之人，有煩惱病，亦復如是。雖有多聞，不止煩惱，不能自利。

※譬如有人，服王貴藥，不能將適，為藥所害。

多聞之人，有煩惱病，亦復如是。得好法藥，不能修善，自害慧根。

※迦葉！譬如摩尼寶珠，墮不淨中，不可復著。

如是，多聞貪著利養，便不復能利益天人。

※譬如死人，著金瓔珞。

多聞破戒比丘，被服法衣，受他供養，亦復如是。

※如長者子，剪除爪甲，淨白洗浴，塗赤栴檀，著新白衣，頭著花鬘，中外相稱。

如是，迦葉！多聞持戒，被服法衣，受他供養，亦復如是。

又，大迦葉！四種破戒比丘，似善持戒。

何謂為四？

①有一比丘，具足持戒，大小罪中，心常怖畏。所聞戒法，皆能履行。身業清淨，口業清淨，意業清淨，正命清淨。而是比丘，說「有我論」。是初破戒

似善持戒。

②復次，迦葉！有一比丘，誦持戒律，隨所說行，「身見」不滅。是名第二破戒比丘似善持戒。

③復次，迦葉！有一比丘，具足持戒，取眾生相而行慈心。聞「一切法本來無生」，心大驚怖。是名第三破戒比丘似善持戒。

④復次，迦葉！有一比丘，具足修行十二頭陀，見「有所得」。是名第四破戒比丘似善持戒。

復次，迦葉！善持戒者：無我，無我所；無作，無非作；無有所作，亦無作者；無行，無非行；無色，無名；無相，無非相；無滅，無非滅；無取，無捨；無可取，無可棄；無眾生，無眾生名；無心，無心名。無世間，無非世

間；無依止，無非依止；不以戒自高，不下他戒，亦不憶想分別此戒。

是名諸聖所持戒行，無漏不繫，不受三界，遠離一切諸依止法。

爾時，世尊欲明了此義，而說偈言：

清淨持戒者	無垢無所有	持戒無憍慢	亦無所依止
持戒無愚癡	亦無有諸縛	持戒無塵汙	亦無有違失
持戒心善軟	畢竟常寂滅	遠離於一切	憶想之分別
解脫諸動念	是淨持佛戒		
不貪惜身命	不用諸有生	修習於正行	安住正道中
是名為佛法	真實淨持戒		
持戒不染世	亦不依世法	逮得智慧明	無闇無所有

無我無彼想	已知見諸想	是名為佛法	真實淨持戒
無此無彼岸	亦無有中間	於無此彼中	亦無有所著
無縛無諸漏	亦無有欺誑	是名為佛法	真實淨持戒
心不著名色	不生我我所	是名為安住	真實淨持戒
雖行持諸戒	其心不自高	亦不以為上	過戒求聖道
是名為真實	清淨持戒相		
不以戒為最	亦不貴三昧	過此二事已	修習於智慧
空寂無所有	諸聖賢之性	是清淨持戒	諸佛所稱讚
心解脫身見	除滅我我所	信解於諸佛	所行空寂法
如是持聖戒	則為無有比		

依戒得三昧 三昧能修慧 依因所修慧 逮得於淨智

已得淨智者 具足清淨戒

說是語時。五百比丘，不受諸法，心得解脫。三萬二千人，遠塵離垢，得法眼淨。五百比丘，聞是深法，心不信解，不能通達，從坐起去。

爾時，大迦葉白佛言：世尊！是五百比丘，皆得禪定，不能信解入深法故，從坐起去。

佛語迦葉：是諸比丘皆增上慢。聞是清淨無漏戒相，不能信解，不能通達。佛所說偈，其義甚深。所以者何？諸佛菩提，極其深故。若不厚種善根，惡知識所守，信解力少，難得信受。

又，大迦葉！是五百比丘，過去迦葉佛時，為外道弟子。到迦葉佛所，欲求

長短。聞佛說法，得少信心，而自念言：「是佛希有，快善妙語。以是善心，命終之後，生忉利天。忉利天終，生閻浮提，於我法中，而得出家。」是諸比丘，深著諸見，聞說深法，不能信解，隨順通達。

是諸比丘，雖不通達，以聞深法因緣力故，得大利益，不生惡道，當於現身得入涅槃。

爾時，佛語須菩提言：汝往將是諸比丘來。

須菩提言：世尊！是人尚不能信佛語，況須菩提耶！

佛即化作二比丘，隨五百比丘所向道中。

諸比丘見已，問化比丘：汝欲那去？

答言：我等欲去獨處修禪定樂。所以者何？佛所說法，不能信解。

諸比丘言：長老！我等聞佛說法，亦不信解，欲至獨處修禪定行。

時，化比丘語諸比丘言：我等當離自高逆諍心，應求信解佛所說義。

所以者何？無高無諍，是沙門法。所說涅槃，名為滅者。

為何所滅？是身之中，有我滅耶？有人有作，有受有命，而可滅耶？

諸比丘言：是身之中，無我，無人，無作，無受，無命，而可滅者。但以貪欲瞋癡滅故，名為涅槃。

化比丘言：汝等貪欲瞋癡，為是定相可滅盡耶？

諸比丘言：貪欲瞋癡，不在於內，亦不在外，不在中間。離諸憶想，是則不生。

化比丘言：是故，汝等莫作憶想。若使汝等不起憶想分別法者，即於諸法，

無染無離。無染無離者，是名寂滅。

所有戒品，亦不往來，亦不滅盡。定品，慧品，解脫品，解脫知見品，亦不往來，亦不滅盡。

以是法故，說為涅槃。是法皆空，遠離亦不可取。

汝等捨離是涅槃想，莫隨於想，莫隨非想，莫以想捨想，莫以想觀想。

若以想捨想者，則為想所縛。汝等不應分別一切受想滅定。一切諸法，無分別故。

若有比丘滅諸受想，得滅定者，則為滿足，更無有上。

化比丘說是語時，五百比丘不受諸法，心得解脫。來詣佛所，頭面禮足，在一面立。

爾時，須菩提問諸比丘言：汝等去至何所？今何從來？

諸比丘言：佛所說法。無所從來。去無所至。

又問：誰為汝師？

答言：我師先來，不生亦無有滅。

又問：汝等從何聞法？

答言：無有五陰、十二入、十八界，從是聞法。

又問：云何聞法？

答言：不為縛故，不為解脫故。

又問：汝等習行何法？

答言：不為得故，不為斷故。

又問：誰調伏汝？

答言：身無定相，心無所行，是調伏我。

又問：何行心得解脫？

答言：不斷無明，不生明故。

又問：汝等為誰弟子？

答言：無得無知者，是彼弟子。

又問：汝等已得幾何，當入涅槃？

答言：猶如如來所化入涅槃者，我等當入。

又問：汝得已得己利耶？

答言：自利不可得故。

又問：汝等所作已辦耶？

答言：所作不可得故。

又問：汝等修梵行耶？

答言：於三界，不行亦非不行，是我梵行。

又問：汝等煩惱盡耶？

答言：一切諸法，畢竟無盡相故。

又問：汝等破魔耶？

答言：陰魔不可得故。

又問：汝等奉如來耶？

答言：不以身心故。

又問：汝等住福田耶？

答言：無有住故。

又問：汝等斷於生死往來耶？

答言：無常無斷故。

又問：汝等隨法行耶？

答言：無礙解脫故。

又問：汝等究竟當至何所？

答言：隨於如來化人所至。

須菩提問諸比丘時，有五百比丘不受諸法，心得解脫。三萬二千人，遠塵離垢，得法眼淨。

爾時，會中，有普明菩薩白佛言：世尊！菩薩欲學是《寶積經》者，當云何住？當云何學？

佛言：菩薩學是經所說「皆無定相」，而不可取，亦不可著。隨是行者，有大利益。

普明！譬如有人乘坏船，欲渡恆河。以何精進，乘此船渡？

答言：世尊！以大精進，乃可得渡。所以者何？恐中壞故。

佛告普明：菩薩亦爾，欲修佛法，當勤精進，倍復過是。

所以者何？是身無常，無有決定壞敗之相，不得久住，終歸磨滅。

未得法利，恐中壞故。我在大流，為度眾生斷於四流故，當習法船。乘此法船，往來生死，度脫眾生。

云何菩薩所習法船？

謂：平等心。一切眾生，為船因緣。習無量福，以為牢厚清淨戒板。

行施及果，以為莊嚴。淨心佛道，為諸材木。一切福德，以為具足堅固繫縛。忍辱柔軟憶念為釘。諸菩提分，堅強精進。最上妙善法林中出。不可思議無量禪定福德業成。善寂調心，以為師匠。畢竟不壞，大悲所攝。以四攝法，廣度致遠。以智慧力，防諸怨賊。善方便力，種種合集。四大梵行，以為端嚴。四正念處，為金樓觀。四正勤行，四如意足，以為疾風。五根善察，離諸曲惡。五力彌浮，七覺覺悟，能破魔賊。入八真正道，離意到岸，離外道濟。止為調御，觀為利益。不著二邊，有因緣法，以為安隱。大乘廣博，無盡辨才，廣布名聞，能濟十方一切眾生。而自唱言：「來上法船，從安隱道至於涅槃。」

槃。度身見岸，至佛道岸離一切見。」

如是，普明！菩薩摩訶薩應當修習如是法船。以是法船，無量百千萬億阿僧祇劫，在生死中，度脫漂沒長流眾生。

又告普明：復有法行，能令菩薩疾得成佛。謂：諸所行，真實不虛，厚習善法，深心清淨，不捨精進，樂欲近明，修習一切諸善根故。常正憶念，樂善法故。多聞無厭，具足慧故。破壞憍慢，增益智故。除滅戲論，具福德故。樂住獨處，身心離故。不處慣鬧，離惡人故。深求於法，依第一義故。求於智慧，通達實相故。求於真諦，得不壞法故。求於空法，所行正故。求於遠離，得寂滅故。

如是，普明！是為菩薩疾成佛道。

說是經時。普明菩薩、大迦葉等諸天、阿修羅，及世間人，皆大歡喜，頂戴奉行。

大寶積經．普明菩薩會

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

## 附錄一 晉譯經文勝解勝利段

於是，尊者須菩提白世尊曰：甚奇！甚特！此《寶嚴經》，饒益發起趣摩訶衍諸族姓子族姓女。

須菩提復問世尊：諸族姓子族姓女說此《寶嚴經》者，得幾所福？

世尊告曰：迦葉！若有恆沙國土滿中七寶，供養如恆沙等諸佛如來等正覺，及弟子眾，如恆沙劫，一切施安。至般泥洹後，起七寶塔。不如是族姓子族姓女聞此《寶嚴經》，受持諷誦，為他人說，不誹謗也。

若有女人說此經者，是女人終不墮惡趣，亦不復受女人身也。

復次，迦葉！若有族姓子欲以一切玲妙供養此經典者，當受持、讀誦、書寫經卷，為他人說，是為供養此經典已。

若有受持、諷誦、書寫、為人說者，則為供養諸佛如來。

若族姓子族姓女說此《寶嚴經》，教授他人書寫經卷，在所著處，是為天上天下最妙塔寺。

若從法師聞「受持讀誦書寫經卷」者，當敬法師，為如如來。

若敬法師供養奉持者，我記彼人必得無上正真道，命終之時，要見如來，是人當得十種身清淨。

云何為十？①死時歡喜無厭，②眼目不亂，③手不擾亂，④足不擾亂，⑤身不煩擾，⑥不失大小不淨，⑦心不污穢，⑧心不錯亂，⑨手不摸空，⑩隨其坐命終。是謂十種身清淨也。

復次，迦葉！當得十種口清淨。

云何為十？①善音，②軟音，③樂音，④愛音，⑤柔和音，⑥無礙音，⑦敬音，⑧受音，⑨天所受音，⑩佛所受音。是謂十種口清淨也。

復次，迦葉！當得十種意清淨。

云何為十？①無恚，不怒他人，②無恨，不語，③不求彼短，④無結縛，⑤無顛倒想，⑥心無懈怠，⑦戒不放逸，⑧意樂布施歡喜受，⑨離貢高慢，⑩得三昧定，獲一切佛法。是為十種意清淨也。



妙法寺 香港新界屯門藍地 <https://www.mfbm.hk>